

长寿王经 1 卷

No. 161 [No. 152(10)]

长寿王经

僧佑录云安公失译经人名今附西晋录

闻如是：

一时，佛在舍卫国祇树给孤独园。是时，佛告诸比丘：「昔有菩萨为大国王，名曰长寿；王有太子，名曰长生。王治国以政，刀杖之恼不加吏民，风雨时节五谷丰熟。有邻国王治行暴虐，不修正治国民贫困，谓傍臣曰：『我闻长寿王国去是不远，炽饶丰乐，而无兵革之备。我欲往彼攻夺其国，为可得乎？』傍臣对曰：『大善！』遂兴兵，而行到长寿王国界。

「界上吏民走行白王曰：『彼贪王兴兵而来，欲攻明王之国，唯愿备豫。』长寿王召其群臣，而告之曰：『彼所以来者，但贪我国人民仓谷珍宝耳。若与其战，必伤吾民。夫诤国杀民，吾不为也。』群臣曰：『臣等皆晓习战法，必能胜彼，不使明王之兵为彼所侵也。』王曰：『若我胜彼，即有死伤。彼兵、我民俱惜寿命，爱我害彼，贤者不为也。』群臣不听，留王于宫，乃自相与于外发兵，出往界上逆而距之。

「长寿王乃谓其太子曰：『彼贪我国，故来攻我。今群臣以我故，欲逆而距之。夫两敌相向，必有缺伤，今欲与汝俱委国亡去。』太子言：『诺。』即父子共踰城而出，幽隐山间。

「于是贪王遂入其国，募求长寿王金千斤、钱千万。长寿王后日，出于道边树下坐。有远方婆罗门来，亦息于树下。问长寿王曰：『卿何处人？何缘在此？』王曰：『我此国中人也，偶来到此戏耳。』长寿王问婆罗门：『贤者从何所来？将欲所之？』婆罗门言：『我远国贫鄙之道士，遥闻此国长寿王好喜布施、周救贫羸，吾故远来，欲从乞用自生活。不知王意于今云何？

卿是国人，听闻其意，于今何如？故肯布施不也？』王默自念：『子用我故，故从远来，值我失国，到无所得而当空去。甚可哀念。』

「于是，王乃垂泪，而谓婆罗门曰：『我即是长寿王也。有他国王前来攻我，我委国亡隐藏此间。今闻贤者故来相归，值我空穷无以相副，将奈之何？』两人相向，哽咽啼泣。王曰：『我闻新王慕我甚重，卿以我头往，可得重赏。』婆罗门曰：『遥闻大王周救一切，故来乞匄，庶得几微以养余命。值王失国，自我薄福，今教断头不敢承命。』王曰：『卿故远来欲有所得，遇我困乏，无以相副。且人生世皆当趣死，吾等当死，愿以身相惠，何为辞让之也？今若不取，后有来者，我犹与之，不如早取也。』婆罗门言：『我不忍杀大王。大王若有弘慈之意，必欲殒命以相惠施者，但当散手相随去耳。』王即随去，到城门外，而令缚之以白贪王。王即雇婆罗门金钱之赏，遣令还去。

「贪王于是，乃使人于四街道头烧杀长寿王。王故，群臣白贪王曰：『此臣等故君，今当就终歿之罪，愿得为设微具以遣送之。』贪王听之。群臣具饌，哽咽临之，人民观者皆言：『王枉死。』郭邑草野莫不呼天。

「太子长生时出在道边，听闻人语，知父为贪王所得，乃佯担樵出于市卖之，间闹人中。当父前住，观见父当死，心中悲痛。父见长生，恐其瞋恚为父报怨，父乃仰天太息曰：『夫为人子欲为至孝，使汝父死而不恨慎。莫为汝父报怨也，即汝父乐死而不忧；若违父言行杀他人者，即令汝父死有余恨。』长生不忍见其父死，因还入山，长寿王遂就烧死之诛。

「长生久后自念：『我父仁义深笃，至死不转；而此贪王无状，不别善恶，枉杀我父。虽我父有慈惻淳仁之心，死而不恚；然我不能忍也，我不出杀此贪王者，我终不苟生于世矣。』遂出佣赁。国中大臣徇园于市赁人，得长生。使种菜种，菜甚好。后日，大臣案行园田，见菜甚好，呼问园监。园监对曰：『前赁得一人使为之，故好如是。』大臣因呼长生，见之问言：『卿颇能作饮食不耶？』对曰：『能作。』使作饮食甚甘美，因以请王。王往临食，饮食甘美，因问：『谁作此食者？』臣对曰：『臣前赁一人，能作此食。』王遂呼，将归宫使作饮食。

「后日，王问长生：『汝宁便习兵法不？』对曰：『实便习之。』王因取以置边，而告之曰：『我有怨家，是长寿王子。恒恐行来卒与我相逢，今相恃怙，幸相助备之。』长生对曰：『唯然，当为大王展力效命。』

「后日，王问长生：『汝宁好猎不？』对曰：『臣少好猎。』王便勅外严驾，因与长生共出行猎。适入山林便见走兽，王与长生驰而逐之，转入深山惑失道径，不能得出。迷惑三日，遂至饥困，王因下马解剑以授长生曰：『我甚疲极，汝坐，我欲枕汝膝卧。』长生言：『诺。』王便得卧。长生自念：『我前后以来求索子便，今日已得我所愿。』便拔剑欲杀贪王。思惟：『我父临死时嘱我恳恳，奈何快我愚意，而违慈父绝歿之教。』即内剑而止。王便惊悟，问长生曰：『我梦见长寿王子欲来杀我，我大惊怖。何以如此？』长生曰：『是山中有强鬼神，见大王在此，故来恐怖大王耳。臣自侍卫，王但安卧无所畏惧也。』

「王还得卧，长生复拔剑欲杀之，重思忆父言复止。王复惊悟，告长生曰：『我故复梦见长寿王子故欲来杀我，我大畏之。何以尔也？』长生曰：『是故山神所为耳。王无所畏也。』王复还卧，长生复拔剑欲杀之，思惟父言复止，遂弃剑于地，无复杀王之意。王复惊悟，告长生言：『我复梦见长寿王子，自言：「原赦。」不杀我。』于是长生曰：『我即是长寿王太子长生，我实故来出，欲杀大王以报父怨。念我父临死时殷懃嘱我，不欲使我报怨；而我愚痴故欲违父之言，详思父教恳恻殷懃，不敢违之。是故今投剑于地，以顺父言。虽尔，犹恐后日迷惑失计，而违亡父教也。今故自告，愿大王便诛伐我身，早灭其恶意，可使终始断绝也。』王乃自悔曰：『我为凶逆，不别善恶，贤者父子行仁淳固至死不转，而我贪酷初不觉知。今日如是，命属子手。子故怀仁，惟忆父言而不相害，诚感厚润。今欲还国，当从何道也？』长生言：『我知道径前故来者，迷惑大王欲报父怨耳。』

「长生遂与王俱出林外，便见群臣散满林际。王便止坐，施設饮食。王问群臣：『卿等宁识长寿王子长生不？』中有不识者，对曰：『不识。』中有识者，昔受长生恩，恐王杀之，亦言：『不识。』王便指示言：『是即长生也。』王曰：『从今日始，我自还我故国，愿以此国还付太子；从今日始，卿为我弟，若有他国来相侵夺，当相救助。』王遂率臣兵归其本国，国有奇物更相贡遗。」

佛告诸比丘：「时长寿王者，今我身是也；太子长生者，阿难是；贪王者，调达是。调达与我世世有怨，我虽有善意向之，故欲害我。阿难与之，本无恶意，故至相见即有和解之心。菩萨求道勤苦如是，至见贼害无怨恚之心，故自致得佛，为三界尊。」

诸比丘欢喜，为佛作礼。

佛为海船师，	法桥度河津，
大乘道之舆，	一切度天人，
亦谓自解结，	度岸得升仙。
都使诸弟子，	缚解至泥洹，
敬谒法王来，	心正道力安。
最胜号为佛，	名显若雪山，
譬华净无疑，	得喜如近香。
万身观无厌，	光若灵曜明，
八正觉自得，	无离无所染。
爱尽破欲网，	自然无师受，
我行无师保，	志独无等侶。
积一得作佛，	从是通圣道，
至道无往返，	玄微清妙真。
不歿不复生，	是处为泥洹，
此要寂无上，	毕竟不受辛；
虽天有善处，	皆莫如泥洹，
吾师天中天，	三界无极尊。
相好身丈六，	神通游虚空，
华熏去五阴，	拔断十二根。
不贪天世位，	心净开法门，
佛为无上法，	道御清等行。
三宝于后世，	绝灭诸欲情，
离苦胜无为，	常乐快安宁。
愿常会佛前，	等度诸群生，
佛所本行愿，	精进百劫勤。
四等大布施，	十方受弘恩，
持戒净无垢，	慈柔护众生。
用慧入禅定，	大悲普读经，
常为智所仰，	众圣所共宗。
释梵以为师，	乃知佛为尊，
难值无有比，	最上无过者。
功德以流布，	当为稽首礼，

听我歌十方， 弃盖寂定禅。
光彻照七天， 德香殊栴檀，
上帝神妙来， 叹仰欲见尊。
释梵齐敬意， 稽首欲受问，
所以佛度世， 福施以周匝。
所说教戒行， 在在悉分明，
亦以法流布， 弟子乐受行，
令天人鬼龙， 敬受头面礼。

长寿王经

【经文信息】大正藏第 03 册 No. 0161 长寿王经

【版本记录】CBETA 电子佛典 Rev. 1.14 (Big5)，完成日期：2010/10/28

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，北美某大德提供，Jasmine 提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】
